

99
NO SOALAN :43

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. TUAN WILLIAM LEONG JEE KEEN
(SELAYANG)**

PERTANYAAN : LISAN

TARIKH : 21.03.2018

Y.B. TUAN WILLIAM LEONG JEE KEEN [SELAYANG] minta **MENTERI KEWANGAN** menyatakan apakah impak peningkatan dan pengukuhan nilai ringgit Malaysia.

JAWAPAN

Tuan Yang Dipertua,

1. Pada tahun 2017, ringgit telah menambah nilai sebanyak 10.4% berbanding dengan dolar Amerika Syarikat (AS) dari RM4.486 ke RM4.062, antara yang terbaik dalam kalangan negara serantau. Mata wang ringgit terus menunjukkan prestasi yang baik pada tahun 2018 dengan ringgit menambah nilai sebanyak 4.2% berbanding dengan dolar AS (sehingga 14 Mac 2018). Perkembangan ini berpunca daripada kemasukan semula aliran dana portfolio pelabur bukan

pemastautin ke dalam pasaran kewangan Malaysia berikutan prestasi ekonomi negara yang menggalakkan.

2. Apabila ringgit menambah nilai, sebahagian sektor ekonomi akan meraih manfaat manakala ada juga sektor ekonomi tertentu yang mungkin terjejas. Pengimport terutamanya akan menerima manfaat berikutan penurunan kos barang yang diimport apabila ringgit bertambah kukuh. Isi rumah juga akan dapat meningkatkan perbelanjaan bagi barang yang diimport dan lebih berkemampuan untuk melancong ke luar negara.
3. Sebaliknya, pengeksport akan menerima hasil yang lebih rendah dalam nilai ringgit atau berkemungkinan mengalami penurunan dalam permintaan terhadap barang buatan Malaysia apabila ringgit menambah nilai.
4. Peningkatan nilai ringgit baru-baru ini mencerminkan pengukuhan asas-asas ekonomi negara. Pada tahun 2017, ekonomi negara mencatat pertumbuhan sebanyak 5.9% yang disokong oleh permintaan dalam negeri. Selain itu, pada tahun 2017 juga, jumlah pelaburan yang diluluskan oleh MIDA berjumlah RM197.1 bilion berbanding hanya RM105.5 bilion pada tahun 2010. Seterusnya, melalui perbelanjaan yang berhemah dan berdisiplin, defisit fiskal sebagai peratusan KDNK berjaya dikurangkan daripada 6.7% pada 2009 kepada 3% pada 2017. Rizab antarabangsa negara pula mencatat RM419.5 bilion (USD103.7 billion) pada 28 Februari 2018.

(b)

Bagi memastikan perkembangan positif ini berterusan, Kerajaan terus menumpukan usaha untuk meningkatkan daya tahan dengan mempelbagaikan sumber ekonomi serta memperkuatkan daya saing negara.